

《大方廣圓覺修多羅了義經導讀》補充講表

◎附表八

○彼知覺者，猶如虛空，知虛空者，即空華相……有無俱遣，是則名為淨覺隨順。

◆知覺：即能知空華之知覺，仍指真智而言。此智由離念而顯，當體即真。故曰：猶如虛空。虛空，喻真理也。如智如理，原無二如。若更起念欲知同虛空之真智者，即是於虛空中，又復生出空華矣。故曰：即空華相。古德所謂「靈光獨耀，迴脫根塵」。光同淨鏡，不同鏡體之無知。故曰：不可說言無知覺性。同虛空，非有也。靈光耀，非無也。非有非無，故曰：有無俱遣。

◆既然俱遣，則不可說有，又不可說無，當如何稱謂？故曰：是則名為淨覺隨順。謂淨圓覺心，可以隨順證入矣。

◆上科破境，此科又破智。真智無須乎泯。然博地凡夫，用功之時，以智觀境。此智並非真智，仍是情識。特下手時，不能不借以為用耳。故須逐層遣除，如知身心是空華矣。然彼知是空華之知覺，亦如虛空之華。更進一步，即知此知覺，如空華之知覺；亦是空華之相，一切皆無實體。

◆然而知覺之性即無耶？亦不可說。所謂「不許說有，不許說無」。蓋說有即執有，說無即執無。凡有所執，即是妄念，必須有無一切俱遣，無知而知，知而無知，方為淨覺。

○何以故？虛空性故，常不動故，如來藏中無起滅故……究竟圓滿，遍十方故。

◆如來藏（以下糅合太虛大師《楞伽經義記》卷二）

- 一、約覆藏中釋。如來：佛果上一切無漏無為法。藏：覆於眾生有漏心中，通於九法界。
- 二、約自性清淨心，即如來本因隱藏而未顯釋。謂眾生本具佛性，但隱而未顯。

※《大乘起信論裂網疏》卷四云：「因該果海，名如來藏，亦可名為理即法身。果徹因源，

名為法身，亦可名為究竟如來藏也。」

◆首句，謂何以有無俱遣，名為淨覺隨順？此徵起也。以下是釋成：

◆先釋淨字，即指清淨真如，虛空句，即起信真如中之空義，非有無一異等相，以離虛妄心念故。常不句，指真如體。其體不變，故無能動。如來句，指真如用，體能不變隨緣，所謂隨染淨緣，起十界事。雖隨緣起滅，而本體凝然，故無起滅。既無起滅，惟是真體，則根塵迴脫；雖有知見，憑何為依，故無知見。既起滅無從，知見不立，則脫然清淨矣。

◆次釋覺字。法界，指事法界言。謂一一事法，各有界分，不相紊故。言如法界性如字，作稱字看。言知淨覺已，仍復諦觀此理，稱法界而為性，此即理隨事遍也。究竟句。既知理隨事遍。仍須審諦進觀。久之不見有事，全事全理，故云：圓滿。此即事得理融也。既得事理融通，自能互遍互攝，重重無盡。故曰：遍十方故。此釋淨覺隨順義也。

○是則名為因地法行。菩薩因此於大乘中，發清淨心，末世眾生依此修行，不墮邪見。」

◆首句，結前因地法行，以下正示。謂如來既依之成佛，菩薩即宜因此發心。發心求佛，自應不慕小道，故云：於大乘中，發菩提心。即前所發三心是也。末世眾生，若能依此發心修行，自然得正住持，而不墮邪見。

△偈頌

◆凡偈頌有四種不同：一、通頌：不論長行偈頌，但數滿三十二字，即為一偈。二、諷頌：但以偈說法，非頌長行。我祖名為孤起頌。三、應頌：與長文相應故。又稱重頌。為鈍根人重說故。四、集施頌：謂集少言以攝多義，施他誦持故。如槃特迦所持者是也。

今於四中，屬應頌攝。此一種中，開之復有六種：

◆一、超頌：長文在後，頌在前故。二、追頌：以前之長文未頌，追其已失而頌故。三、

廣頌：長文略而頌廣故。四、略頌：長文既詳，頌可略故。五、補頌：長文未周，頌中補出，文不類而義同故。六、義頌：文與長行異，義與長行一故。

○文殊汝當知，一切諸如來，從於本因地，皆以智慧覺，了達於無明。

◆此經俱略頌也。長行猶恐未周，今復說偈，故告以當知，謂少言而攝多義，不可忽也。中二句，文同長行。智慧，即指清淨覺相。覺字，即能斷無明，成佛道。了：謂根本能生枝末。達：謂枝末即有身心。執我執法，妄有輪轉。

○知彼如空華，即能免流轉。又如夢中人，醒時不可得。

◆空華，兼攝二月。彼字，指現前身心言。知字，即始覺智，《大乘止觀》稱為無塵智。謂設能知彼四大假合之身，六塵緣影之心相，如空華二月，自然不起我法二執，又無造業招報等事，故能免流轉也。

◆意謂起念成迷，似有無明。故如夢中之人，夢時非無。若離念即覺，覓之了不可得，如醒時不得也。觀此，足知滅本無滅，生亦無生。故長行云：『於無生中，妄見生滅，故說輪轉生死』。誠可憫也。

○覺者如虛空，平等不動轉。覺遍十方界，即得成佛道……成道亦無得，本性圓滿故。

◆首二句，頌諸妄淨盡也。覺字，長行云彼知覺者。所謂了妄即真，故如虛空。平等者，既知真妄同空，則有無生滅，皆平等也。不動不轉，真體不變，三世不遷，長行所稱淨覺者此也。次二句，頌不真何待也。其意謂諦觀淨覺，理隨事遍，故曰：覺遍。覺既遍已，仍進觀之，事得理融，互遍互攝，故得至十方界，所以即成佛道。

◆後三句之意：謂眾幻元無，並非滅真。佛道本成，又非得真。須知本性圓滿，因執妄而成輪。妄盡真圓，義言成佛。幸勿以有成為疑，而難問也。

